



Il president communal da Flem Adrian Steiger (pld) ha intunà l'impurtanza d'in concept da segirezza gist er per vischnancas turisticas.

FOTO G. N. STGIER

Esser pront per il cas dals cas

Protecziun da la populaziun e protecziun civila

■ (anr/rgd) Il cussegl grond ha approvà mesemna duas novas leschas davart la protecziun da la populaziun e davart la protecziun civila dal chantun Grischun.

L'incumbensa da la protecziun da la populaziun è da proteger la populaziun en cas extraordinaris, ils quals na pon betg vegnir superads cun ils mezs usitads. Il cussegl federal determinescha las incaricas da la protecziun da la populaziun per cas da catastrofes u conflicts armads en ils trais secturs planisaziun, mantegniment da l'administraziun civila ed il salvament. «Questa lescha ans porscha ina moda d'agir tar catastrofes», ha ditg Mario Salis (pps, San Murezzan), commember da la cumissiuin per giustia e segirtad. Sco catastrofes da la natura pussaivlas numna il cussegl federal teratrembels, stemprads, auaziuns, lavinas, boas, sitgiras e brischaments da guaud. Ch'i saja da quintar cun in augment da situaziuns d'urgenza e cun in'intensitad augmentada. La protecziun da la populaziun cumpiglia dentant er periclitaziuns chaschunadas da l'uman sco accidents cun vitgira privlusa e catastrofes chaschunadas d'epidemias. Tenor l'analisa da privel vegn il privel d'ina pandemia schizunt taxà sco ristg il pli grond per la populaziun dal chantun Grischun.

Separar la protecziun da la populaziun e la protecziun civila

La protecziun da la populaziun e la protecziun civila vegnan da nov regladas en duas differentas leschas. Enfin uss eran quests dus secturs reglads ensemen en la lescha davart l'agid en cas da catastrofes. «Cun quest pass segirain nus ina legislaziun sin il pli nov stan, conforma a las directivas federalas», ha intunà *Andri Perl* (ps, Cuir). Durant che la lescha davart la protecziun da la populaziun regla surtut las incumbensas dal chantun e da las vischnancas e la finanziaziun, suonda la lescha davart la protecziun civila il dretg federal. La nova lescha davart la protecziun da la populaziun duai determinar pli precis las incumbensas da chantun e da vischnancas. *Nicoletta Noi*, deputada independenta dal circulo da Roveredo, ha fatg attent a la difficultà per vischnancas pitschnas da pudair elavurar in concept da segirtad. Tenor il cusseglier guvernativ *Christian Rathgeb* è dentant la pussaivladad d'agir er en cas d'urgenza ina incarica essenziala d'ina vischnanca. Il deputà *Adrian Steiger* (pld, Trin) ha fatg attent ch'er la defensiun d'attatgas virtualas sin ils systems d'informatica dal chantun tutgia tar la protecziun da la populaziun en il Grischun.

Autorisar la regenza d'applitgar dretg d'urgenza

En la nova lescha vegn statuada ina disposiziun che autorisescha la regenza explicitamain d'applitgar dretg d'urgenza. Ella duai avair la lubientscha da midar il dretg vertent per garantir ils basegns fundamentals da la populaziun en cas d'urgenza. Per quest intent ston ils dretgs individuals dal singul sa suttametter en favur da la cuminanza. «En il cas urgent, che nus sperain ch'el na schabegia mai, èsi essenzial ch'ils instruments necessaris sajan avant maun», ha suttastitgà *Reto Cramer* (pcd, Belfort). Il cussegl grond ha approvà la lescha davart la protecziun da la populaziun suenter discussiun animada cun 113 encunter nulla vuschs tar ina abstenziun.

Nova lescha davart la protecziun civila

La nova lescha davart la protecziun civila sa basa da princip sin las prescripziuns federalas. En detagl regla ella l'obligaziun da las vischnancas per il mantegniment d'implants da protecziun civila respectivamain las indemnisaziuns, sch'ellas n'èn betg ablas da mantegnair in tal implant. Er questa lescha ha il cussegl grond approvà cun 113 encunter nulla vuschs tar ina abstenziun.